

YA UN DJIS TA TRINTA ANA PASA: Maart 1977- Maart 2007!

ARUBA, PA REALIZA SU SEPARACION, LIBERTAD Y INDEPENDENCIA,

CU SOSTEN DI NACIONNAN UNI, TA TENE UN REFERENDUM DI AUTODETERMINACION

RIBA E FECHA DI GRAN PATRIOTISMO : MAART 25, 1977:

E dia cu sigur por ser considera esun di gran sentimentonan patriotico: 25 di Maart, 1977, cu merece ser proclama: “Dia di nos Patriotanan”! E pueblo Arubano participando na e prome y unico referendum di Autodeterminacion teni aki na Aruba, resolutamente ta duna su Gran y final Mandato, pa cumpli cu su Separacion, su Libertad y Independencia : Pa semper e ta baas den su mes cas: Pa nos isla tin su derecho debidamente garantiza

como Isla/Pais/Estado Soberano, cu un igual status na di e Pais Hulanda, den un Reino Hulandes nobo, moderno, sui generis: di un Gemenebest cu un “nieuwe rechtsorde”, cu si realmente ta respeta democracia, y e libertad, igualdad y soberania di cada pueblo, pa reemplaza e statuut actual, anticua y obsoleto . Na Juni 1977 e Pueblo ta reconfirma su mandato pa medio di un eleccion, pero na Augustus 1977 e pueblo ta wordo provoca pa sali na defensa

di su soberania, democracia, y derecho inalienabel di autodeterminacion ora cu no ta respeta e mayoria absoluto eligi pa forma parti di e gobierno central. E politiconan Arubano encarga pa e Pueblo pa a realiza su mandato duna, ya for di 1976 a pone fecha pa su realizacion pa 1981, como condicion pa por forma parti di un Gobierno Central nobo, pa mas pronto cu ta posibel, pasa podernan den man di Gobierno di Aruba, pa nos por ta cla cu nos

independencia na aña 1981, y oficialmente ta pone esaki den nan carta na e formador di gobierno. E fecha 25 di Maart, mescos cu e fecha 18 di Maart a ser scogi como cu na 1947 e pueblo Arubano a usa e “Unie” acorda dia 25 di Maart 1947 entre Hulanda y Indonesia, como base pa e peticion cu nan a firma na 1947, hunto cu e prome “Constitucion” pa Aruba como Pais den Reino, presenta na Augustus pa e Comision Separacion, segun e deseonan di e Pueblo Arubano y cu a keda presenta na La Reina na 1948? Un “Unie” cu ta duna Aruba e “volkomen zelfstandigheid, volkomen onafhankelijkheid” cu segun e palabranan di shon Henny Eman den Staten e temponan ey, tabata e deseo di henter Aruba.

Y e palabranan di Kwartsz den Staten e tempo ey, a menciona e igualdad den e Unie entre Hulanda y Indonesia, como e igualdad cu e pueblo Arubano semper a desea entre Aruba, Hulanda y e otro islanan. Awe cu ainda no a cumpli cu e Mandato di Pueblo duna bon cla na 1977, ta bon pa nos haci nos mes e siguiente preguntanan: Si Betico a pone materialismo prome, mescos cu shon Henny Eman y Juancho Irausquin, cu lo kier a habri un refineria petrolero prome, of lo kier a desaroya turismo prome, nos Pais Aruba, apesar di e ciere di Lago, for di 1986 lo a bira un Pais Volwaardig cu su propio Constitucion/ Grondwet manera acorda na 1983? Bo por imagina’bo si Willem van Oranje of George Washington tambe lo a warda te ora nan ta financieramente independiente prome?

*Si e peticion firma na 1947, por ser considera como un referendum, y tambe e eleccion na 1973, e referendum di 1977 anto ta nos di tres referendum di autodeterminacion, pero e hecho cu e resultado oficial di e referendum di 1977 a keda entrega na Nacionnan Uni, Hulanda y Antiyas, a haci’e de facto uno internacionalmente reconoci y acepta! Cu awe nos ta un Pais Volwaardig, ta gracias na e Pueblo su Lucha pa Independencia, corona cu e Referendum di Autodeterminacion aki, y e hecho cu a keda demostra cu Gobierno Hulandes no por a spanta nos Pueblo cu nan “Independencia per luchtpost”, ni cu ningun di e otro intimidacionnan emocional haci di nan parti, e.o. di lo no tin derecho riba un pasaporte y nacionalidad Hulandes!

Algo cu parece cu poco-poco, den e mundo di globalizacion, cu aparentemente fronteranan lo bira obsoleto, cuminzando na Europa mes, lo haci e nacionalidad y pasaporte Hulandes tambe un dia obsoleto? Gracias na nos gran Patriotanan cu a uni riba 25 di Maart 1977 como un gran Nacion, cu a haci posibel cu na Augustus 1985 unanimamente nos politiconan, apesar di e cierre di Lago, cu lo a bay pone nos Pais bay algun paso atras, a aproba cu gran honor nos Grondwet/ Constitucion, pa a base di esaki yama eleccion pa a eligi e prome Gobernacion di e PAIS Aruba, cu e status di PAIS Volwaardig igual na e “status aparte” den Reino Hulandes cu e “Staat der Nederlanden”, e Pais/Estado Hulanda ! Arubiano cu Honor